

मार्निंग डोगरी न्यूज़ बुलेटिन,

समा. 09.20 Hrs

<><><><><>

Headlines

- 1- उपराज्यपाल मनोज सिन्हा होरें जम्मू-कश्मीर च बने दे सुरक्षा हालात दा जायजा लैता। उ'नें एजेंसिएं गी निर्देश दित्ता जे ओह आतंकी नेटवर्क पर लगातार दबाव बनाई रखवना।
2. जम्मू-कश्मीर विधानसभा अपने औदे इजलास थमां कागद-रैहत बनी जाहगा। विधानसभा दा सारा कम्मकाज नेशनल ई-विधान एप्लीकेशन पोर्टल दे राहें तोड़ चाढ़ेआ जाहगा।
3. मुखमंत्रि उमर अब्दुल्ला होरें गरीबें लेई कैंसर दे इलाज ते एहदे प्रबंधन कोश च बड़े बदलाव कीते न तांजे कैंसर दी मार झल्ला करदे गरीब मरीजें पर माली बोझ घट्ट कीता जाई सकै।
4. बर्फबारी करी प्रभावत रौहने आहले राज्यें ते केन्द्र शासत प्रदेशें च मरदमशुमारी आहली प्रक्रिया तैहत आपूं अपनी गिनतरी दर्ज करोआने दे अभियान च जम्मू-कश्मीर अव्वल थाहर पर रेहा ऐ। मुख प्रधान जनगणना अधिकारी होरें मरदमशुमारी 2027 तैहत आबादी दी गिनतरी आहले दुए गेड़ दी शुरुआत करोआई।
5. जम्मू दे डिवीजनल कमिशनर होरें जम्मू खित्ते च तोड़ चाढ़ी जा'रदी सिड़क संपर्क परियोजनाएं दे कम्में च हासल प्रगति दी समीक्षा कीती ते कम्म तोड़ चाढ़ा करदी एजेंसिएं गी निर्देश दित्ता जे ओह रक्ख-रखाव बक्खी चेचा ध्यान देन ते बेवजह दे चिर गी टालना जकीनी बनान।

<><><><><>

LG -Security Review

उपराज्यपाल मनोज सिन्हा होरें इक उच्च सतह दी बैठक लाइए जम्मू-कश्मीर दी सुरक्षा स्थिति सरबन्धी कारवाइएं ते तयारिएं दा जायजा लैता। उ'नें सुरक्षा एजेंसिएं गी हिदायत कीती जे ओह आतंकवादिएं दे नेटवर्क पर दबा बनान ते इस पेठा पैदा होई सकने आहली चुनौतियें कन्नै निबड़ने ते पूरे-पराते तंत्र दा सफाया करने लेई जत्तें गी होर तेज करना। उप-राज्यपाल होरें पुलस ते आम लोकें बश्कार सम्पर्क बदाने- बेहतर रिश्ते कायम करने ते शकैतें दा पारदर्शी- बिजन कुसै दा पक्ख लैते दे ते संवेदनशील तरीके कन्नै नबेड़ा करने दियां हिदायता दितियां। उ'नें सुरक्षाबलें गी नशीले पदार्थें दी तस्करी करने आहलें खिलाफ कारवाई तेज करने लेई आखेआ। अधिकारिएं गी हिदायत कीती गेई जे ओह साइबर चुनौतिएं- सोशल मीडिया- गलत सूचना ते ऑनलाईन ब्लैकमेलिंग पर तक्क रखवने दियां हिदायतां दितियां। उपराज्यपाल होरें बक्ख-बक्ख सुरक्षा एजेंसिएं बश्कार तालमेल बेहतर करने लेई गलाया।

<><><><><>

JKLA Paperless

जम्मू-कश्मीर विधानसभा दे 21 सितम्बर थमां शुरु होने आहले सत्र दौरान बिजन कागज आहला सरिस्ता अपनाया जाग। आकाशवाणी जम्मू संवाददाता दी रिपोर्ट मूजब कनून- न्यां ते पार्लिमानी मामलें सरबंधी मैहकमे आस्सेआ जारी इक इतलाह मूजब सारा कम्मकाज हुन राश्ट्रीय e- विधान ऐप्प राए होग। एह डिजिटल मंच विधानसभा दे कम्मकाज लेई बनाया गेदा ऐ। इस इतलाह च एह बी दस्सेआ गेआ जे विधायकें आस्सेआ जमा करोआए गेदे सोआल पैहले गै मुतलका मैहकमे गी भेजी दिते गेदे न। सारे मैहकमे गी आखेआ गेआ ऐ जे ओह पोर्टल राएं कम्म करन ते बिल- तरमीमां- सोआलें दा परता जां होर दुए दस्तावेज एदे राएं गै जमा करन।

<><><><><><>

Cancer Treatment

जम्मू-कश्मीर सरकारै, गरीबें लेई कैंसर दे इलाज ते एहदे प्रबंधन कोश च बड़े बदलाव कीते न तांजे कैंसर दी मार झल्ला करदे गरीब मरीजें पर माली बोझ गी घट्ट कीता जाई सकै। मुख्मन्त्री उमर अब्दुल्ला हुं'दी अगुवाई आहली सरकारै एहदे लेई सलाना परोआरिक औंदन दी योग्यता आहली हद्द गी 2 लक्ख 40 ज्हार रपें शा बधाइयै 4 लक्ख रपे करी दित्ता ऐ। नमें सिरेया तैयार इस योजना दे तैहत हुन सलाना 3 लक्ख रपें दी औंदन आहले परोआरें गी 75 ज्हार रपें दी माली मदाद दित्ती जाहग जिसलै के सलाना 3 शा 5 लक्ख रपें तगर दी औंदन आहले परोआरें गी 50 ज्हार रपें दी माली मदाद थ्होग। मरीज आयुश्मान भारत – पी.एम जन आरोग्य योजना-सेहत दे कन्नै जुडे दे अस्पताल च जाइयै इलाज करोआई सकदे न ते माली मदाद दी रकम, डी.बी.टी प्रणाली दे राहें सिद्दे उंदे बैंक खातें च मुंतकिल करी दित्ती जाहग।

<><><><><><>

CM -Delegations

मुख्मन्त्री उमर अब्दुल्ला होरें कल श्रीनगर आहले सिविल सचिवालय च नमें IAS अफसरें- वरिश्ठ अधिकारियें ते बक्ख-बक्ख संगठनं दे नुमायंदें कन्नै मलाटी कीती। उ'नें नमें भर्थी IAS अफसरें गी शुभकामनां दितियां ते आखेआ जे ओह पूरी निश्ठा कन्नै लोकें दिएं आसैं-तांगें गी पूरा करने लेई कम्म करन। सूचना ते योजना मैहकमे दी कमीशनर सचिव आर. Alice Vaz होरें जम्मू -कश्मीर च होने आहले अंतराश्ट्रीय फिल्म उत्सव दी तयारियें बारे दस्सेआ। एह उत्सव 7 थमां 10 सितम्बर तगर आयोजित कीता जाग। IGP कश्मीर सुजीत कुमार होरें बी मुख्मन्त्री हुंदे कन्नै मलाटी कीती। अपने ओहदे दा कम्मकाज संभालनं मगरा उ'नें एह मलाटी लाई।

<><><><><><>

Prog. Announcement (Byte)

आकाशवाणी जम्मू दे क्षेत्रीय समाचार एकांश आसेआ अज्ज 2 सितंबर गी दपैही साड्डे 12 बजे राश्ट्री पोषण सप्ताह दे सिलसिले च 30 मिंटे दी इक विशेष परिचर्चा प्रसारित कीती जाहग। एहदा विशेसार होग “संतुलित आहार थमां बेहतर सेहत तगर जीवन लेई पोषण”। इस कार्यक्रम च खास मेहमान होडन जम्मू-कश्मीर दे मन्त्रे-परमन्त्रे दे डाइटिशियन विक्रम सबरवाल, जेडे इस विशे पर अपने माहिराना बचार सांझा करडन। इस कार्यक्रम दी मेजबानी न्यूज एंकर विजय बजाज हुं’दे आसेआ कीती जाहग.....(बाइट)

<><><><><><>

ते हुंन बाकि दिएं खबरें कन्नै विजय बजाज:-

<><><><><><>

JK Self Enumeration (Byte)

बर्फबारी करी प्रभावत रौहने आहले राज्यें ते केन्द्र शासत प्रदेशें च मरदमशुमारी आली प्रक्रिया दे तैहत आपूं अपना नांऽ दर्ज करने यानि Self Enumeration दे अभियान च जम्मू-कश्मीर अव्वल थाहरै पर रेहा ऐ। जम्मू-कश्मीर ते लद्दाख दे मुख् प्रधान जनगणना अधिकारी अमित शर्मा होरें कल उधमपुर च डुडु ते बसंतगढ़ थमां बर्फबारी करी प्रभावत रौहने आले इलाकें च आबादी दी गिनतरी आले अभियान दा दुआ गेड़ शुरु करांदे मौके एह गल्ल आखी। उं’नें दस्सेआ जे जंदी 17 थमां 31 अगस्त धोड़ी आपूं अपनी गिनतरी दर्ज कराने सरबंधी गेड़ दरान जम्मू-कश्मीर च 9 ज्हार 672 लोकें जिसले के लद्दाख च 527 लोकें अपनी गिनतरी दर्ज कराई। ध्यानजोग ऐ जे जम्मू-कश्मीर दे 16 जिलें च ते कन्नै पूरे लद्दाख च हुन आबादी दी गिनतरी आला कम्म कीता जाहग। एहदे परैन्त पैहली थमां 5 अक्तूबर धोड़ी नज़रसानी आला गेड़ आयोजित कीता जाहग। इस बारे जानकारी सांझी करदे होई मुख् प्रधान जनगणना अधिकारी अमित शर्मा होरें आखेआ.....(बाईट)

<><><><><><>

Div. Com Road Projects

जम्मू दे डिवीजनल कमिशनर रमेश कुमार होरें एन.एच.ए.आई, एन.एच-आई.डी.सी.एल, बीकन-संपर्क ते पी.एम.जी.एस.वाई दे तैहत जम्मू खित्ते च तोढ़ चाढी जा’रदी सिड़क संपर्क परियोजनाएं दे कम्में च हासल प्रगति दी समीक्षा कीती। उं’नें कम्म तोढ़ चाढा करदी एजेंसिएं गी आखेआ जे ओह सुरंगें दे निर्माण कम्म, सिड़कें गी फोर लेन बनाने ते सिड़कें ते पुलें दे कम्में गी सबूरा करने च तेजी आहनन ते तय समें-सीमाएं दी सख्ती कन्नै पालमा बी जकीनी बनान। परियोजनाएं दे रक्ख-रखाऽ दी जरूरतै पर जोर पांदे होई डिवीजनल कमिशनर होरें सिड़कें पर गड्डें दी फौरी तौर पर मरम्मत करने सने तबाह होई दिएं सिड़कें गी ब्हाल करने ते लोडचदे सुरक्षा हीले अपनाने दे निर्देश जारी कीते। उं’नें सरबन्धत अधिकारिएं गी निर्देश दित्ते जे ओहू मुआवजे आहले मामलें च तेजी आहनन ते बेहतर ढंगै सिर तालमेल दे राहें परियोजनाएं च पेश औने आहली रूकावटें

गी बी दूर करना। उ'नें खबरदार करदे होई आखेआ जे महत्वपूर्ण ढांचागत परियोजनाएं च बेवजह लगने आहले चिर गी बर्दाश्त नेई कीता जाहगा।



Pahari Folk Festival (Byte)

रामबन जिला पहाड़ी समुदाय दी समृद्ध सांस्कृतिक विरासत दा जश्न मनाने लेई पूरी चाली तयार ऐ। 2 रोजा एह उत्सव 5 ते 6 सितम्बर गी पोगल परिस्तान च मनाया जाग। इस कार्यक्रम दा आयोजन मुकामी सैलसफा गी बढ़ावा देने ते पहाड़ी रिवायतें- कला- भाषा ते लोक नाच-संगीत- नृत्य ते खान-पान गी बढ़ावा देने लेई कीता जा'रदा ऐ। इस कार्यक्रम गी पहाड़ी Ethnic सोसाइटी आसेआ जिला प्रशासन रामबन ते जम्मू-कश्मीर कला- संस्कृति ते भाषा सरबन्धी अकादमी दे सहयोग कन्नै मनाया जा'रदा ऐ। इस 2 रोजा उत्सव च शामिल होने लेई सैलानिएं- संस्कृति प्रेमिएं- मीडिया कर्मिएं ते पहाड़ी समुदाय दे लोकें गी साह्रा दिता गेआ ऐ। इस बारे होर जानकारी दिंदे होई पहाड़ी Ethnic Society दे Convener कृष्ण सिंह सुम्बरिया होरें आखेआ.....(बाईट)

